


Deporte Local

Grand Master Chaco Cornelio a ricibi standing ovation na Best of the Best Taekwondo Challenge



Prome medaya di oro den bowling 25 aña pasa



ORANJESTAD (AAN) - Diasabra ultimo a tuma luga e di 23 Best of the Best Taekwondo Challenge organiza pa Brazil Taekwondo Stichting den Centro di Bario Brazil. Grand Master Chaco Cornelio kende a distancia su mes for di Taekwondo a presenta na Best of the Best. Grand Master Chaco Cornelio a trece bon energia pa

tur hende presente. Mester bisa cu durante henter dia tur pelea a bay bon sin cu un hende a haya un lesion. Manera cu Grand Master Chaco Cornelio a drenta e porta, tur hende presente a lanta for di nan stoel y a duna Grand Master Chaco Cornelio un standing ovation. Cali Manuel di Corsou a pasa un microfoon pa Grand Master

Chaco y a haci un entrevista chikito cu Grand Master Chaco Cornelio. Grand Master Chaco Cornelio a splica den corto cu e ta ocupa cu algun proyecto cu e tin pendiente pa caba cune y e no por a keda henter dia. Grand Master Chaco Cornelio a desea tur atleta hopi forza y exito den Best of the Best.

ORANJESTAD (AAN) - Awe ta un dia historico den historia di Aruba. Dia 22 di November 25 aña pasa, Edna Maduro, e bolichero conoci den comunidad a logra e prome medaya di oro pa pais Aruba. Esaki el a logre durante un campeonato na

Puerto Rico. Pa Edna y tambe pa Aruba esaki sigur ta algo pa keda marca den historia di deporte. Awe ainda Edna ta hungando bowling y ta yudando tanto chiquito y grandi pa nan pasion cu bowling. Pabien Edna.

Comentario

Pueblo cansa di tantísimo ladroncía

ORANJESTAD (AAN): Por spera cu un dia lo yega cu ladronnan lo wordo mal sirbi y den pasado esaki a yega di tuma lugar. Hasta den pasado e ciudadano mihor conoci como "Felix Ras" tabata harta di ladronnan cu ta horta di criyonan. Un dia el a lanta a expresa cu ta basta, el a gara e ladron y a mare man cu pia bente di su pickup y a bay direccion warda di polis Oranjestad.

El a staciona su pickup dilanti warda di polis Oranjestad y a hisa benta e ladron den warda. Wel e comandante na warda e tempo ey tabata e conocido Shen Pe Krozendijk a haye cu un homber mara den warda el a sali pafu puntra e chofer di e pickup Felix Ras, kico a pasa e homber mara benta

den warda, wel Felix a laga sa esey ta ladron cu ta horta su bestianan pa nan sere. Pero debi cu no tin keho entrega mester a corta e cabuayan mara na man y pia di e sospechoso pa lage libertad. Pero e homber mara transporta den pick-up lo a pasa un susto enorme, parce cu nunca mas e lo a mishi cu pertenencianan di ningun hende.

Ya nos ta yegando final di 2018 lo ta bon pa doño cas percura preveni ladron drenta facil den cas. Camara di seguridad ta sumamente importante.

Awe unda cu bo por ta sea na Aruba den exterior bo por nota y wak kende a yega na bo porta cas pa medio di bo celular y bati porta. Alarma instala na cas tambe ta pa preveni.